

Wednesday, July 30, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

NPMU

Northeast Petroleum Mazdoor Union chuan Mizoram panna kawng a chhiat nasat avang leh tuialhthei phurh luh nana a him tawh loh avangin August ni 1 atangin tlan tawh lo ni se tih an rel.

Northeast Petroleum Mazdoor Union General Secretary Ramen Das in IOC Chief General Manager hnena lehkhaw a thawn atanga tarlan danin Mizoram Oil Tanker Driver Association te chuan July ni 19-a Mizoram kawng a chhiat nasat avanga nawrh an huaihawt hnuah pawh Mizoram kawng chuan ziaawm lam a pan theihloh avangin tlan tawhloh ni se an ti a, Mizoram kawngin ziaawm lam a pan hma chu August ni 1 atangin tlan tawhloh ni se an ti bawh.



NHM PROTEST

NHM hnuaia thawk Health Worker-ten Mizoram Sorkar-in Health Worker nghet 100 a lak turah National Health Mission hnuaia Health Worker hun rei tak lo thawkte tan reservation dah phutin vawiin khan Chief Minister Office Gate bulah an pungkawm.

NHM thawktute hi vawiin chawhma khan Chief Minister pisa gate bulah an pungkawm a, tun hnuaia Mizoram sawrkar Health Worker regular post 100 a lak tura advertisement a chhuah chu hriatthiam har antih thu sawiin hun rei tak anlo nghah leh beisei, Minister te pawhin an sawi hmuh seniority list anga tahtawla dahngheh tura an ngaih laiin hetiangah ruahmanna a awm mai chu hriatthiam har antih thu sawiin sawrkar chuan post 100 a lak turah mi 50 tal NHM hnuaia Contract Health Worker thawk lai te dah nghet ve ngei turin an phut tih an sawi bawh.

NHM thawktute chuan tuna Health Worker advertisement chhuak ah NHM hnuaia thawk lai ten an dil ve theih nan computer certificate neilo leh kum over tawh te hrethiam turin sawrkar an phut tih an sawi bawh.



MNF PRESS CONFERENCE

MNF General Secretary Pu Lalremruata Chhangte in Chief Minister Pu Lalduhoma'n sorkar Dan dinglai pawt fan chung leh kuthnathawktute Sawhthing man tam tak la batsak mek chungah car man to a lei thar a sawifah tir dan chu Zoram mipuite hmuhsitna leh zah lohna nasa tak a ni a ti.

He thu hi vawiina Aizawl Press Club a thuthar thehdarhtute a kawmnaah a sawiin Pu Lalremruata Chhangte chuan Chief Minister Pu Lalduhoma'n inthlan

campaign laia tum engemawzat mipui hmaa a thutiam leh ZPM sorkar lakluh ni ngeiah pawh chanchinbumite hmaa a thusawi bawhchhiain kumin June ni 17 khan Car man to tak cheng nuai 29 chuang man Toyota Innova Hycross a lei thar a. A thutiam chiang taka a bawhchhiat avanga mipui lam atanga sawiselnaah ngaihdam dil a hneka nimin July ni 29-a ZPM Party thupuangtu Pu K.Laltluangkima hmanga a insawifiah dan chu Zoram mipuite engahmah a ngaih lohna leh hmuhsitna nasa tak a ni a ti a. ZPM thupuangtu in thuthar thehdarhtute hnenah a sawi angin, CM car lei thar cheng nuai 30 vel lai man chu mi satliah car ang, hmeichhe khalh tawh, naupang football khel tur hruaina tawh angah Chief Minister Pu Lalduhoma chuan a lo ngai a nih chuan car man to a tih chu cheng engzat man chin nge? tih mipui hmaah sawifiah tel turin a phut tih a sawi.

Byte: MNF General Secretary Lalremruata Chhangte

MNF General Secretary chuan mahni intiamna ngei, awlsam taka bawhchhe nghal mai duh ram hruaitulu ber atana Mizoramin a nei mek chu vanduaithlak an tih thu a sawi a, a insawifiahna chu amah thlang tlingtu leh chhiah petu mipuite nasa taka diriam zuina a ni a ti bawh.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



TKP DAY

Wawiin hi Baptist Kohhran hnuaia Thalai Kristian Pawl (TKP) din cham wawi 74-na a ni a, Mizoram pumah hemi pual hian hun hman a ni.

Kumin TKP Day thupui chu “Danglam lo ringtu” tih a ni a. TKP Day hi kum tin member ten urhsun takin an hmang thin a. Unit tam zawk chuan zing karah khawtlang tana thil tha tiin vantlang hmun leh Biak In leh a chhehvel te an tifa a. Zan lamah MTKP atanga programme duansa angin Unit tinah TKP Day lawmna Inkhawm urhsun takin an nei thin a ni.

Kumin TKP Day pual hian unit thenkhat chu Biak in leh a chhehvel tifa in an hnattlang a, thenkhatin thlanmual leh hmun hrang hrang an tifa a. Wawiinah hian awmnikhama hun hman a remchan loh avangin tlai lam leh zan inkhawm ban hun awlah te TKP Unit te chuan an ni pual hian hun hmang turin ruahmanna an siam a. Thalaite Krista hnungzuinaah chak zawka an kal theih dantur te, Kohhran tana ban rinawm an nih chhoh zel theih nana inzirtir nan leh infuihthar nan te an hmang a ni.

MTKP-in an tarlan dan chuan Mizorama Baptist Bial 92-ah TKP Unit 448 a awm a. Headquarters Area-ah member 31,245 an awm mek a, Aizawl Area-ah member 10,351 awmin Lawngtlaiah member 8,568 an awm a, an vaiin member 50,364 awmin mipa 30,562 leh hmeichhia 19,802 an ni.

Kohhran kutke tangkai leh member tamna ber ṬKP hi Presbytery (tuna Assembly ni ta)-in a phalsak angin kum 1952 Inkhawmpui, Pukpui-a rorelnain ṬKP din a rawtna chu pawmpuiin Pastor Biala din phalna pawh a pe nghal a. BCM Kohhran dinna hmun hrang hrangah Unit leh Bial ṬKP chu a lo ding ta a ni.

